

四庫全書

集部

欽定四庫全書

集部

石湖詩集卷十六至九

詳校官庶吉士 臣 陳若霖

主事 臣 呂雲棟覆勘

總校官庶吉士 臣 何思鈞

校對官編修 臣 勵守謙

謄錄監生 臣 蔣繼勲

欽定四庫全書

石湖詩集卷十六

宋 范成大 撰

麻線堆

峽口驛前大山崛起舊路攀援而上縈紆如線十五年前浮圖德寶始沿澗伐木作

新路不復登山余觀峽路皆未嘗經修感德寶之事作麻線堆詩一首以風夔路使者及歸峽

二州長吏沈
葉管熊四君

雲木盪胸起鬱哉一峯危上有路千折纏縷如縈絲是
為麻線堆厥險天下稀偈仄容半足顛墜寧復稽騰猿

尚愁苦游子將安之浮屠德寶者悲智緒等慈隨山刊
古木尋壑得長磯輿梁捷飛度布石綿階梯自從新路
改重趺無齋咨縣有孫少府琬琰劉文詞勿云此事小
惟有行人知况觀峽山路由來欠平治官吏既弗跡誰
肯深長思天險固自若當令路成蹊土工運畚鍤石工
操鑿椎烈火敗硤确築沙填隙巖多用百夫力遠無五
旬期但冀米鹽給不煩金幣支非客敢竊議道傍詢旄
倪身雖雪山戍亦願助毫釐工費嗟小哉政須賢有司

東有管夷陵西有葉种歸上維沈隱侯夔臺今吏師下
維熊繹孫長材佐州麾豈吾金閨彥不如林下緇懸知
議克合了此一段奇舟檝避潢潦置郵疾飛馳憧憧吳
蜀客來往當無時仍磨鑽天石大書四賢詩不佞願秉
筆遠寄峽口碑

戲書麻線堆下

一身半世走奔波疑是三生宿債多折券已饒麻綿嶺
責償難免竹竿坡

胡孫愁

傾崖當胸石齧足失勢毛毳攜幽谷王孫却走斷不到
惟有哀猿如鬼哭僕夫酸嘶訴塗窮我亦付命無何中
悲風忽來木葉戰落日虎嘒枯竹叢

判命坡

鑽天嶺上已飛魂判命坡前更駭聞側足三分垂壞磴
舉頭一握到孤雲微生敢列千金子後福猶幾萬石君
蚤晚北窓尋噩夢故應含笑老榆枌

千石嶺

晨光挂高嶺晴色媚遠客哀湍吼叢薄宿霧裊絕壁露
重薊花紫風來蓬背白迷塗朴渥跳飲澗於菟跡層巔
多折木連磴有飛石不知山幾重杳杳入叢碧

九盤坡布水

莫惜縈迴上九盤洗心雙瀑雪花寒野翁酌水煎茶獻
自古人來到此難

荒口

十步九喫蹶百夫半蹶跚豁然鳥道窮努力造其巔謂
是嶺頭了一峯復當前既無反顧法仰望心茫然

四十八盤

詰曲不前如宜拙歌傾當面似交難若將世路比山路
世路更多千萬盤

紫荷車

峽山此
藥甚多

綠英吐弱線翠葉抱修莖矗如青旄節草中立亭亭根
有却老藥鱗皴友松苓長生不服學聊冀病身輕

錦帶花

東南甚珍此花
峽中漫生山谷

妍紅棠棣粧弱綠薔薇枝小風一再來飄飄隨舞衣吳
下嫵芳檻峽中滿荒陂佳人墮空谷皎皎白駒詩

入秭歸界

山根繫馬得漿家深入窮鄉事可嗟蚯蚓崇人能作瘴
茱萸隨俗強煎茶幽禽不見但聞語野草無名都著花
窈窕崎嶇殊未艾去程方始問三巴

蚤發周平驛過清烈祠下

屈平祠也祠
前有獨醒亭

物色近人境，喜歡嚴曉裝。
山月雞犬聲，野風麻麥香。
登嶺既開豁，入林更清涼。
三呼獨醒士，倘肯醺我觴。

白狗峽

陸路亦自峽上過
西岸有玉虛洞

江紋圓復破，樹色昏還明。
連灘竹節稠，洶怒奔夷陵。
石磯鐵色頑，相望如姦朋。
踞岸意不佳，當流勢尤獍。
山回水若盡，但見青鈴峩。
慘慘疑鬼竄，幽幽無人聲。
顛沛安危機，艱難古今情。
俯窺得目眩，却立恐神驚。
白雲冒巖扉，下維玉虛庭。
神仙坐閱世，應笑行人行。

种歸縣

周封楚子熊繹於此縣宇宋玉宅東山清烈祠屈原宅也

永日貪程客
長年弔古詩
悲秋荒故宅
負石慘空祠
峻壁鴉翻倦
高畬麥秀遲
窮山熊繹國
偈仄建邦時

歸州竹枝歌二首

東鄰男兒得湘纍
西舍女兒生漢妃
城郭如村莫相笑
人家代閱似渠稀

東岸艤船拋石門
西山炊煙連白雲
竹籬茅舍作晚市
青蓋黃旗稱使君

昭君臺

在興山界中鄉人憐昭君築臺望之
下有香溪然三峽女子十人九瘦

天生尤物元無種萬里巴村出青塚高臺望思臺已荒
東風溪漲流水香嬋娟鍾美空萬古翻使鄉山多醜女
炙眉作癡亦不須人人有瘦如鉈壺

人鮐瓮

在歸州郭下長石截然據江三之二水盛
時清淖極大號峽下最險處東岸即屈原

宅自此復登
舟至巫山

懷沙祠下鐵色磯中流東湍張禍機與齋俱入彼可弔
乘流而行吾亦危江河難犯一至此天地好生安取斯

朝歌勝母古尚諱我其覆醢航秭歸

巴東峽口

水宿頻歌側徒行又險艱舟危神女峽馬瘦鬼門關
照夜燒畬隴綠雲種竿山催成頭雪白休說鬢絲斑

初入巫峽

鑽火巴東岸擬金峽口船東江崖欲合漱石水多漩
卓午三竿日中間一罇天偉哉神禹跡疏鑿此山川

將至巫山遇雨

數日快晴水落丈餘舟人方以為喜雨作即水又長矣

峽行水落惟憂雨通昔淋浪怨行旅千山萬山生白煙
陽臺那得雲如許牋詞騰告翠帷僊句我一晴翻手閒
放開十二峯頭色重賦碧叢高插天

巫山高

并序

余舊嘗用韓無咎韻題陳季陵巫山圖攷宋玉賦意
辨高唐之事甚詳今過陽臺之下復賦樂府一首世
傳瑤姬為西王母女嘗佐禹治水廟中石刻在焉

濕雲不收煙雨霏峽船作灘梢廟磯杜鵑無聲猿叫斷

惟有飢鴉迎客飛西真功高佐禹跡斧鑿鱗皴倚天壁
上有瑤簪十二尖下有黃湍三百尺蔓花蚪木風煙昏
鮮珮翠帷香火寒靈旂飄忽定何許時有行人開廟門
楚客詞章元是諷紛紛餘子空嘲弄玉色顏顏不可干
人間錯說高唐夢

刺瀆淖

并序

瀆淖盤渦之大者峽江水壯則有之或大如一間屋
相傳水行峽底遇暗石則瀆起已而下旋為渦然亦

未嘗有定處或無故突然而作叵測也再行遇之小則歌傾大則與齋俱入險惡之名聞天下

峽江饒暗石水狀日千變不愁灘瀧來但畏瀆淖見人言盤渦耳更險顧有間仍於非時作未可一理貫安行方熨穀無事忽翻練突如湯鼎沸翕作茶磨旋勢迫中成窪怒霽外始暈已定稍安慰條作更驚眩漂漂浮沫起疑有潛鯨喫勃勃駭浪騰復恐蟄鼉扑篙師瞪唬魄灘戶呀雨汗浚巡怯大敵勇往決鏖戰幸免與齋入還

憂似蓬轉驚呼招竿折奔救竹竿斷九死船頭爭萬苦
石上牽旁觀兢薄冰撇過捷飛電前余叱馭來山險固
嘗徧今者擊檝誓豈復憚波面澎澎三峽長颭颭一葦
亂既微掬指忙又匪科頭慢天子賜之履江神敢吾玩
但催疊鼓轟往助雙槳健

嘲峽石 并序

峽山江濱亂石萬狀極其醜怪不可形容舉非世間
諸所有石之比走筆戲題且以紀異

峽山狠無情其下多醜石頑質賈憎唾傀狀發笑啞粗
類墳壤黃沉漬鐵矢黑或如溝泥浣或似凍壁圻堆疑
聚廩粟墜若壞城甃槎牙鏤朽木狼籍委枯骼礪砢包
羸蚌淋漓錮鉛錫縱文瓦溝壠橫疊衣摺襍鱗斂斧鑿
餘坎窞蹴踏力云何清淑氣孕此詭譎跡我本一丘壑
嗜石舊成癖端溪紫琳腴洮河綠沉色階冊截肪膩泗
磬鳴球擊嵌空太湖底偶立韶江側真陽剡千巖營道
剡寸碧倦游所閱多未易一二籍竭來茲山下刺眼昔

未覩或云峽多材奇秀鬱以積絕代昭君村驚世屈原
宅東家兩兒女氣足豪萬國山石何重輕奚暇更馳液
我亦味其言作詩曉行客

勞畬耕

并序

畬田峽中刀耕火種之地也春初斫山衆木盡蹶至
當種時伺有雨候則前一夕火之藉其灰以糞明日
雨作乘熟土下種即苗盛倍收無雨反是山多磽确
地力薄則一再斫燒始可藝春種麥豆作餅餌以度

夏秋則粟熟矣官輸甚微巫山民以收粟三百斛為
率財用三四斛了二稅食三物以終年雖平生不識
秔稻而未嘗苦飢余因記吳中號多嘉穀而公私之
輸顧重田家得粒食者無幾峽農之不若也作詩以
勞之

峽農生甚艱斫畬大山巔亦植無土膏三刀財一田頗
具穴居智占雨先燎原雨來亟下種不爾生不蕃麥穗
黃剪剪豆苗綠芊芊餅餌了長夏更遲秋粟繁稅畝不

什一遺兼得饕餮何曾識杭稻捫腹嘗果然我知吳農

事請為峽農言吳田黑壤腴吳米玉粒鮮長腰瓠犀瘦

齊頭珠顆圓紅蓮勝彫胡香子馥秋蘭或收虞舜餘或

自占城傳早秬與晚秬濫吹甌窳間

長腰米狹長亦名箭子齊頭白圓淨

如珠紅蓮色微亦香子亦名九里香斗米入數合作飯
芳香滿案舜王稻焦頭無鬚俗傳瞽瞍燒種以與之占
城種來自海南秬秠秬秠禾價
最賤以上皆吳中米品也不辭春養禾但畏秋輸官

姦吏大雀鼠盜胥衆螟螣掠剩增釜區取盈折緡錢兩

鍾致一斛未免催租廩重以私債迫逃屋無炊煙晶晶

雲子飯生世不下咽食者定游手種者長流涎不如峽
農飽豆麥終殘年

巫山縣

自此復登陸至夔門縣前掉石灘最險登岸以過舟謂之盤灘城樓對高唐門此去

瞿唐不百里縣人以郭西流石堆為水信流石沒則灝瀕如馬矣

借馬巫山縣盤舟掉石灘梅肥朝雨細茶老暮煙寒門
對高唐起江從灝瀕難流堆三尺在旅夢一枝安

自巫山遵陸以避黑石諸灘大雨不可行泊驛中
一日吏士自秭歸陸行者亦會

巫山信是陽雲臺客行五日雲不開陰晴何嘗有朝暮
夜雨少休明復來今朝水長不知數沒盡山根蒼石堆
東磯西磯盡如削大灘小灘俱若雷不知瞿唐復何似
想見萬頃淙一盃祇今水剩已壯矣聞道陸程尤艱哉
摩圍隘口石生角蹋颯坡前泥似醅眼前安得故園路
江沙江草便青鞋

燕子坡

大山如牆缺小山如塚累衆山直下看方知此峯危木

未見夔峽一溝壑春泥中有天下險造化真兒嬉峯頂
不滿笑舟中鬢成絲登高尚超覽况乃絕俗姿

鬼門關

天作隴頭石關人言要隔塵樊百年會須作鬼無事先
穿鬼關

離巫山好晴午後入瞿唐關憇高齋半日

一昨題詩訴苦霖果然連夜卷曾陰盡收行雨瑤姬賜
不徇世情巫峽心喜鵲滿枝朝日淡哀猿何處宿雲深

水門山徑高齋外一枕清風屏萬金

高齋即杜詩所謂
暝色延山徑高齋

次水
門者

灩澦堆

灩澦之石誰劖鑿惡駭天下形眇然客行五月潦始漲
但見匹馬浮黃湍時時吐沫作漬淖潏潏有聲如粥煎
蜀江西來已無路鑿山作澮方成川瞿唐之口狹如帶
乃欲納此江漫漫奔流下赴故徧仄汝更爭道當其前
舟師歌傾落膽過石孽水禍吁難金山川丘陵皆地險

惟此險絕餘難肩東坡筆端喙三尺願與作賦評嘲喧
云非此石峽更怒白頭忽作傾城妍我從巫山飛一棹
歡喜偶脫蛟龍涎是非信否未暇詰且上高齋清晝眠

夔州竹枝歌九首

五月五日嵐氣開南門競船爭看來雲安酒濃麴米賤
家家扶得醉人迴

赤甲白鹽碧叢叢半山人家草木風榴花滿山紅似火
荔子天涼未肯紅

新城果園連瀼西枇杷壓枝杏子肥半青半黃朝出賣
日午買鹽沽酒歸

嫠婦趁墟城裏來十五五市南街行人莫笑女龐醜
兜郎自與買銀釵

白頭老媪簪紅花黑頭女娘三髻丫背上兜眠上山去
採桑已閒當採茶

百衲畬山青間紅粟莖成穗豆成叢東屯平田秔米軟
不到貧人飯甑中

白帝廟前無舊城
荒山野草古今情
只餘峽口一堆石
恰似人心未肯平

灩澦如撲瞿唐深
魚復陣圖江水心
大昌鹽船出巫峽
十日泝流無信音

當筵女兒歌竹枝
一聲三疊客忘歸
萬里橋邊有船到
繡羅衣服生光輝

雲安縣

春暮子規少日斜
紅鵲飛兩山多布
水一島幾柴扉
蛸

吐無窮壤人行不斷磯巴陽昨夜雨灘上水先肥杜子美詩

云涪萬無杜鵑雲安詩云終日子規啼今萬州界固不聞杜鵑而雲安已自少矣紅鷓飛時滿背純赤或云即黃鸝也峽中蚯蚓之盛無如雲安江濱潰壤戢戢無際又多巨石岸有一石長里許者杜子美詩云禹功多斷石其實甚長兩山間雨後瀑泉樓千百處尤可觀

萬州自此後登陸州號南浦郡

晨炊維下巖晚酌樣南浦波心照州榜雲腳響衙鼓前

山如屏牆得得正當戶西江朝宗來循屏復東去此萬州形

勢也惟親歷者當知此言之工官曹倚巖樓市井喚船渡瓦屋仄石磴

猿啼聞人語剔核杏餘酸連枝茶賸苦窮鄉固瘠薄陋

俗亦寒窶

土人賣杏皆先剔其核取仁以爲藥也土茶甚苦不簡枝葉雜菜更煎之

營營謀

食艱寂寂懷甄訴昔聞吏隱名今識吏隱處

橫溪驛感懷

行徧天涯與地隅筋骸那比十年初朱顏有酒且留住
白髮無方能掃除未得歸田先作賦專攻種樹已成書
祇今飛到南山下猶解清晨出荷鋤

午夜登嶠山

瘴暑嚴夜衰乘涼躡危嶠猿依黑林號鬼閃青炬嘯驚
鳥動危葉吟蟲滿荒草泉聲遠相隨山色近如杳夢猶
風燈前身已雲木杪浮生固有役遠道何時了豈惟失
寢興亦自倒昏曉恭惟天心仁頗議民力槁我懷漢制
詔來尉蜀父老熙如春臺登沃若時雨膏須知簡書急
勿厭蓐食蚤但勤筆力淬時助詩腸攪

峽石鋪

萬州至此山頂皆有長石如城壁亘數
峯不斷峽山至是亦稍開廣間有稻田

峯頭壁立偉天造萬雉石城如帶繞山骨鱗皴火種難

山下流泉却宜稻新秧一稜綠茸茸茅花秋生雪搖風
后皇嘉種不易熟野草何為攬歲功

蟠龍嶺

自峽歸夔萬至於梁山五郡間不知其幾嶺梁山之蟠龍峯門尤為高峻然下嶺即

有平陸吏
皆相賀云

夷陸至胸臆複嶺苦絲亂初程尚勇往少日還委頓安
得長劒揮盡劇疊嶂斷雖云北山愚聊快南冥運此意
竟蕭索勞歌謾淒曼日日望平陸念念到彼岸人言東
馬險但欠蟠龍峻推頽強弩末閔勉焚舟戰譬如已償

通猶有未折券山根治曉裝峯頂寄朝飯稍脫蜥瘡染
還探虎窠翫性命乃可憂筋力何足算

嶺半塗有饅頭山以形得名其

上多驚獸土人謂之虎窠

蟠龍瀑布自山頂漫汗淋漓分數道而下望之宛

從天降當為城中布水第一

銀漢來從左界天天風吹浪落蒼巔人間只見秋田潤
喚作嵒龍洞裏泉

峯門嶺遇雨泊梁山

窮鄉誰與話悲酸
駐馬看雲強自寬
酒力無端妨宿病
詩情不淺任塵官
虎狼地僻炊煙晚
風雨天低夏木寒
行盡峯門千萬丈
梁山鼓角報平安

那郊驛大雨

暮雨連朝雨長亭又短亭
今朝騎馬怕平日繫船聽竹
葉垂頭碧秧苗滿意青
農疇方可望客路敢遑寧

墊江縣屬忠州

青泥沒髀僕頻驚
黃漲平橋馬不行
舊雨雲招新雨至

高田水入下田鳴百年心事終懷土一日身謀且望晴
休入忠州爭米市暝鴉同宿墊江城

巾子山又雨

百日籃輿困跼踟三晨泥坂兀躋攀晚晴幸自墊江縣
今雨奈何巾子山樹色於人殊漠漠雲容憐我稍班班
如今只憶雪溪句乘興而來興盡還

鄰山縣

山頂噓雲黑似煙修篁高柳共昏然鳥啼一夜勸歸去

誰道東川無杜鵑

沒水鋪晚晴月出曉復大雨上漏下濕不堪其憂

晚色熏微暖似薰兒童歡喜走相聞無端星月照濕土

依舊山川生雨雲

吳諺曰星月照濕土明朝依舊雨蓋雨後微晴星月粲然必復雨占之每

驗旅枕夢寒淅屋漏征衫潮潤冷鑪薰快晴信是行人

願又恐田家暴背耘

金山嶺

阪峻身頻偃崖深首屢回雲浮平地出路拂半天來但

闕關山過都忘歲月催湘南初上馬猶插蚤春梅

明日至隣水又雨

昨日方無雨今朝又不晴滿山皆屐齒隨處有泉聲頗
怪陰霖差應催老病成泥塗千騎士與我共勞生

殘夜上峯頂上

片月挂高嶺我行至其巔舉手欲攬擷恐驚乘鸞仙
菲桂香動肅肅露脚寒北斗已到地南斗猶闌干但聞
浮黎音來從始青天大星與之俱曉色明旗旛素煙渺

陸海中有人所冀想見地上友
咨明膏火煎星落玉宇
白日生綺霞丹冰輪未肯去
相看尚團圓

望鄉臺

千山已盡一峯孤
立馬行人莫疾驅
從此蜀川平似掌
更無高處望東吳

蚤晴發廣安軍晚宿萍池村莊

夜雨洗煩蒸曉風薦清穆
雲頭墮鐵山日脚迸金瀑
暑塗一日涼遠客萬事足
羈人正奔波觀者何陸續
翠蓋

立嚴粧青衿行跣足俗陋介南徼物華入東蜀竹萌苦
已青荔子酸猶綠修蘆密成籬直柏森似毒藤泥乾馬蹄
鬆路坦亭堠速暮投何人莊窓戶暗修竹

巴蜀人好食生蒜臭不可近頃在嶠南其人好食
檳榔合蠣灰扶留藤一名萋藤食之輒昏然已
而醒快三物合和唾如膿血可厭今來蜀道又
為食蒜者所薰戲題

旅食諳殊俗堆盤駭異聞南庖灰薦蠣巴饌菜先葷幸

脫蔓藤醉還遭胡蒜薰絲萼鄉味好歸夢水連雲

嘉陵江過合州漢初縣下

井徑東川縣山河古合州木根挈斷岸急雨沸中流關
下嘉陵水沙頭杜老舟江花應好在無計會江樓

新晴行鄭水上與涪江相近

塗泥初乾雨不落日色未出暑光薄畏途得晴天復涼
真是腰錢更騎鶴渾渾鄭水流未平悄悄涪江如鏡清
過盡江沙穿麥壠忽有青蛸扶葉鳴

小溪縣屬遊

寧

刈麥千平壟橫槎一小溪梓花紅綻碎粟穗綠垂低村
婦猶多跣山猿遂少啼東川雉已過錦里尚雲西

茸山道中感懷

侍臣筆橐舊西班大將麾幢又百蠻挂席南箕宿昔事
閃旗東井何時還日增衰病復一日山隔舊游知幾山
倦拂盤陀蒼石坐歸心聊與石俱頑

曉發飛鳥晨霞滿天少頃大雨吳諺云朝霞不出

門暮霞行千里驗之信然戲紀其事

朝霞不出門暮霞行千里今晨日未出曉氣散如綺心
疑雨再作眼轉雲四起我豈知天道吳農諺云爾古來
占滂沱說者類恢悅飛雲走羣羊停雲俗三緇月當天
畢宿風自少女起爛石燒成香汗漉潤如洗逐婦鳩能
拙穴居狸有智蜉蝣強知時蜥蜴與聞計蛭鳴東山鶴
堂審南柯蟻或加陰石鞭或議陽門閉或云逢庚變或
自換甲始刑鷺與象龍聚訟非一理不如老農諺響應

捷如鬼哦詩敢夸博聊用醒午睡

遂寧府始見平川喜成短歌

峽之西遂之東更無平地二千里惟有高山三萬重不
知誰人鑿混沌獨此剗結何其工我本江吳弄水月忽
來踏徧西南峯不知塵界在何許但怪星辰浮半空直
疑飛入蝶夢境此豈應有人行蹤今朝平遠見城郭云
是東川軍府雄原田坦若看掌上沙路淨如行鏡中茅
區粟壠潤含雨楮林竹徑涼生風將士驩呼馬蹄快康

莊直與錦里通半年崎嶇得夷路一笑未暇憐飄蓬

石湖集卷十六

欽定四庫全書

石湖詩集卷十七

宋 范成大 撰

九月十九日衙散回留大將及幕屬飲清心堂觀

晚菊分韻得譟暮字

暮字作樂府

甲光射層雲雨脚不敢到西山明古雪秋日一竿照先
偏井絡密後拒參旗掉分弓滴博平鳴劍伊吾小君看
天山箭狐兔何足了開邊吾豈敢自治有餘巧歸來翠

帷卷聊共黃花笑雖無落帽風亦復接羅倒餘閒校筆
陣刻燭龍蛇埽毛錐乃更勇我亦鼓旗譟

冬至日銅壺閣落成

走遍人間行路難異鄉風物雜悲歡三年北戶梅邊暖
萬里西樓雪外寒已辦鬢霜供歲籥仍拚髀肉了征鞍
故園雲物知何似試上東樓直北看

十二月十八日海雲賞山茶

追趁新晴管物華馬蹄鬆快帽檐斜天南臘盡風啼雪

水下春來水漱沙已報主林催市柳仍從掌故問山茶
豐年自是驩聲沸更著牙前畫鼓撾

雨後東郭排岸司申梅開方及三分戲書小絕令
一面開燕

雨入南枝玉蘂皴合江雲冷凍芳塵司花好事相邀勒
不著笙歌不肯春

鞭春微雨

播勝絲絲雨笙歌步步塵一年新樂事萬里未歸人雲

薄竟慳雪酒濃先受春
送寒東作近慚愧耦耕身

綠萼梅

朝罷東皇放玉鸞
霜羅薄袖綠裙單
貪看修竹忘歸路
不管人間日暮寒

玉茗花

折得瑤華付與誰
人間鉛粉弄粧遲
直須遠寄鸞鴒客
鬢脚飄飄可一枝

張正字母夫人朱氏挽詞

頻藻儀邦媛詩書了歲華
簾金寧遺子羣玉竟傳家
厚施心無數浮生自有涯
空餘報恩子三載亦苴麻

十二月二十四日西樓觀雪

一夜珠簾不下鉤
徹明隨雪上西樓
瑤池萬頃崑崙近
玉壘千峯滴博收
已報春迴南畝潤
從教寒勒北枝愁
四筵都為豐年醉
錄事何須校酒籌

丙申元日安福寺禮塔

成都一歲故事始於此
士女大集拜塔下
然香挂幡

以攘兵
火之災

嶺梅蜀柳笑人忙歲歲椒盤各異方耳畔逢人無魯語

蜀人鄉音極難解其為京洛音輒謂之虜語或是僭偽時以中國自居循習至今不改也既又諱之改作魯語

尤可笑姑就用其字鬢邊隨我是吳霜新年後飲屠蘇酒故事先

然宰堵香石筍新街好行樂與民同處且逢場余新甃石筍街

初三日出東郊碑樓院

故事祭東君因宴此院蜀人皆以是日拜婦

遠柳新晴暝紫煙小江吹凍舞清漣紅塵一闌人歸後

點點飢鳶蹙紙錢

郊外閑驍騎剪柳

亦曰槎柳

千騎同瞻白羽揮驚塵一闌響金鞦不知掣電彎弓過
但覺柳梢隨箭飛

初四日東郊觀麥苗

去歲秋霖麥下遲臘殘一雪潤無泥相將飽喫潯沱飯
來聽林間快活啼

櫻桃花

借煖衝寒不用媒勻朱勻粉最先來玉梅一見憐癡小
教向傍邊自在開

再出東郊

晚景增年慣官身作客諳大都緣偶熟豈是性能堪昔者開三徑他時老一龕越溪親種竹芸綠想氈氈

三月二日北門馬上

新街如拭過鳴騶芍藥酴醾競滿頭十里珠簾都捲上少城風物似揚州

上巳前一日學射山萬歲池故事

北郊征路記前回三尺驚塵馬踏開新漲忽明多病眼

好風如把及時盃
青黃麥壠平平去
疎密楨林整整來
游騎不知都幾許
長堤十里轉輕雷

上巳日萬歲池上呈程詠之提刑

濃春酒煖絳煙霏
漲水天平雪浪遲
綠岸翻鷗如北渚
紅塵躍馬似西池
麥苗剪剪嘗新麪
梅子雙雙帶折枝
試比長安水邊景
祇無飢客為題詩

新作景亭程詠之提刑賦詩次其韻二首

飛鴻銜子謾紛紛
萬里西游始識真
不管吳霜微點鬢

來看蜀錦爛爭春倚闌定有司花女秉燭仍留主夜神
異日賞心誰與共故人新作坐中賓

小築聊鋤草棘荒游人錯比名南棠花邊霧鬢風鬟滿
酒畔雲衣月扇香燦爛吟牋煩索句淋漓醉墨自成行
報章遲鈍吾衰矣終日冥搜謾七襄

錦亭然燭觀海棠

銀燭光中萬綺霞醉紅堆上缺蟾斜從今勝絕西園夜
壓盡錦官城裏花

寶相花

誰把柔條夾砌栽，壓枝萬朵一時開。
為君也著詩收拾，題作西樓錦被堆。

三月二十三日海雲摸石

勸耕亭上往來頻，四海萍浮老病身。
亂插山茶猶昨夢，重尋池石已殘春。
驚心歲月東流水，過眼人情一闌塵。
賴有貽牟堪飽飯，道逢田畯且眉伸。

四月十日出郊

約東南風徹曉忙收雲捲雨一川涼漲江混混無聲綠
熟麥騷騷有意黃更卒遠時間信馬田園佳處忽思鄉
鄰翁萬里應相念春晚不歸同插秧

納涼

雨洗新秋夜氣清悴肌無汗葛衣輕畫檐分月下西壁
絡緯飛來庭樹鳴

西樓獨上

竹日駐微暑松風生蚤秋閒尋來處路獨倚靜中樓老

景驅雙轂鄉心挽萬牛相隨木上坐脚底亦雲浮

曉詣三井觀

路轉市聲遠寬閒古城東適從紅塵來忽入蒼煙叢
心傾穠露芋葉翻微風秋陽澹籬落殘暑不必攻
野老熟睡起日高首如蓬官身騎官馬君應笑龍鍾

曉起

黠鼠綠鈴索飢鴉啄井欄不眠秋漏近多病曉屏寒
咄渠何怪休休我自闌牙門朝日上簫鼓報平安

舫齋晚憩

心作萬緣起境生千劫忙誰同油幕靜獨對篆煙長有
盡天魔力無窮海印光雨餘弦月上塵界本清涼

秋雨快晴靜勝堂席上

一笑憧憧鴈鶩行簿書堆裏賦秋陽心如墜絮沾泥懶
身似飛泉激石忙雨後蹲鴟先稻熟霜前浮蟻鬪棖香
天涯節物遮愁眼且復隨鄉便入鄉

新涼夜坐

吏退焚香百慮空
靜聞蟲響度簾櫳
江頭一尺稻花雨
窗外三更蕉葉風
日日老添明鏡裏
家家涼入短檣中
簡編燈火平生事
雪白眇昏奈此翁

秋老四境雨已沛
然晚坐籌邊樓
方議祈晴樓下
忽有東界農民數十人訴山田却要雨須長吏
致禱感之作詩

歲晚羈懷有所思
秋來病骨最先知
鏡中公案已甘老
紙上課程休諱癡
西堰頗聞江漲急
東山猶說雨來遲

錦城樂事知多少憂旱憂霖感盡眉

西樓夜坐

抗塵懷抱若為寬繞屋蛙聲亦在官
巖桂無香秋遂晚江鱸有約歲將寒
文書散亂嘲癡絕燈火淒清語夜闌
病倦百骸非復我但思禪板與蒲團

立秋月夜

已放新涼入簾紋更驅餘溽避爐薰
穿雲竹月時時見咽露莎蛩院院聞
稍喜雪山無斥堠但虞煙驛有移文

行藏且付蘧蘧夢明發還親鴈鷺羣

前堂觀月

箕踞繩牀政自豪遠游何暇續離騷
蕭森萬竹秋逾瘦突兀雙楠夜更高
東郭風喧三鼓市西城石洶二江濤
色塵聲界如如現本自無禪不用逃

有懷石湖舊隱

浩蕩沙鷗久倦飛摧頽捩馬不勝韉
官中風月常虛度夢裏關山或暫歸
橘社十年霜欲飽鱸江一雨水應肥

冷雲著地塘蒲晚誰為披蓑煖釣磯

太平瑞聖花

雪外捫參嶺煙中濯錦洲
密攢文杏藥高結綵雲毬
百世嘉名重三登瑞氣浮
挽春同住夏看到火西流

無題

聞道明朝送舊官
無情更鼓夜將闌
此生見面知何日
忍淚須臾子細看

晁子西寄詩謝酒自言其家數有逝者詞意悲甚

次韻解之且以建茶同往

我讀晁子詩十語九慨傷長川日夜逝鬢髮空蒼浪君
家出世學無生亦無亡鄉謂法幢立何乃槁木僵起滅
不滿笑古來共掇行豈其捏目華解翳海印光我酒愧
薄薄未能煖愁腸申以春風芽一瀾萬慮忘慧刀倘未
割會且掀禪牀錦里有逢迎謹避舍蓋堂居然足音楚
好在故意長啁耳念一洗遲君鳳鳴岡

蚤衰不寐

官事拘攣似力田作勞歸晚意茫然按摩合體俱非我
展轉通宵似遠年一叟披衣惟兀坐羣免得枕便佳眠
人生元是華胥客休向迷塗更著鞭

晚步宣華舊苑

喬木如山廢苑西古溝疎水靜鳴池吏兵憲宰番更後
樓閣崔嵬欲暝時有露冷螢猶照草無風驚雀自遷枝
歸來更了塵書債目眇昏花燭穗垂

西樓秋晚

樓前處處長秋苔
倦仰璿杓又欲回
殘暑已隨梁燕去
小春應為海棠來
客愁天遠詩無託
吏案山橫睡有媒
晴日滿窓鳬鷺散
巴童來按鴨爐灰

明日分弓亭按閱再用西樓韻

眼看白露點蒼苔
歲月飛流首屢回
老去讀書隨忘却
醉中得句若飛來
聞雞午夜猶能舞
射雉西郊不用媒
自笑支離聊復爾
丹心元未十分灰

丁酉重九藥市呈坐客

余於南北西三方皆走萬里皆遇重九每作水調一

關燕山首句云萬里漢家使桂林云萬里漢都
護成都云萬里橋邊客今歲倦游甚矣不復更

和前曲乃作
此詩以自戲

莫向登臨怨落暉
自緣羈宦阻歸期
年來厭把三邊酒
此去休哦萬里詩
烏帽不辭歌短髮
黃花終是欠東籬
若無合坐揮毫健
誰解西風楚客悲

會慶節大慈寺茶酒

霜暉催曉五雲鮮
萬國歡呼共一天
澹澹煖紅旗轉日
浮浮寒碧瓦收煙
銜盃樂聖千秋節
擊鼓迎冬大有年

忽憶捧觴供玉座不知身在雪山邊

冬至日天慶觀朝拜雲日晴麗遙想郊裡慶成作

驩喜口號

浙浙霜風不滿旗紫煙黃氣捧朝曦五更貫索埋光後
萬里鈎陳放仗時留滯周南無舊事布宣漢德有新詩
豐年四海皆溫飽願把歡心壽玉卮

十一月十日海雲賞山茶

門巷歡呼十里村臘前風物已知春兩年池上經行處

萬里天邊未去人客鬢花身俱歲晚粧光酒色且時新
海雲橋下溪如鏡休把冠巾照路塵

海雲回按驍騎於城北原時有吐番出沒大渡河

上

古道風沙捲夕霏小江煙浪皺春漪天於麥壠猶慳雪
人向梅梢大欠詩頻轡青驪飛脫兔離弦白羽嘯寒鴟
牙門列校俱剽銳檄與河邊禿髮知

合江亭隔江望瑤林莊梅盛開過江訪之馬上哦

此

何處春能蚤疎籬限激湍竹間煙雪迴馬上晚香寒喚
渡聊相覓巡檐得細看極知微雨意未許日烘殘

新作官梅莊移植大梅數十本繞之

臘前催喚主林神玉樹飛來不動塵契濶西湖慚處士
飄零東閣似詩人一天午夢空花碎滿地春愁月影新
埽淨宣華藜藿還他年誰記石湖濱

丁酉正月二日東郊故事

椒盤宿酒未全醒
擾擾金鞍逐畫駟
麥雨一犁隨處綠
柳煙千縷幾時青
客愁舊歲連新歲
歸路長亭間短亭
萬里松楸雙淚墮
風前安得諱飄零

二月二十七日病後始能扶頭

複幕重簾苦見遮
暮占栖雀曉占鴉
殘燈煮藥看成老
細雨鳴鳩過盡花
心為蚤衰元自化
髮從無病已先華
更蒙厲鬼相提唱
此去山林屬當家

病中聞西園新花已茂及竹筵皆成而海棠亦未

過

梅塢桃蹊斫竹初三旬
高臥信音疎
春雖與病無交涉
雨莫將花便破除
祇合蘧蘧隨夢去
何須咄咄向空書
頗聞蜀錦猶相待
去歲今朝已雪如

枕上

一枕經春似宿醒
三衾投曉尚淒清
殘更未盡鴉先起
虛幌無聲鼠自驚
久病厭聞銅鼎沸
不眠惟望紙窓明
摧頽豈是功名具
燒藥爐邊過此生

初履地

扶頭今日強冠簪餘燼收從百戰酣長脰閑軀如瘦鶴
衝風奪氣似枯枿客來慵攬懶殘涕老去定同彌勒龕
何處更能容結習任教花雨落氈氍

密室憊坐

如許頭顱莫振矜但尋曲几與枯藤餘生不直一彈指
此病寧論三折肱何處丹房癡候火誰家籌室強傳燈
本來識字耕夫耳今歲仍添百不能

春晚初出西樓

試倚枯藤似簫雲堂階微步小逡巡
忽逢巖桂新抽葉屈指黃紬睡一春

春晚臥病故事都廢聞西門種柳已成而燕宮海棠亦爛漫矣

軒窓深窈似禪房竟日虛明裊斷香
詩債無邊春已老睡魔有約晝初長
市橋煙雨應官柳墟苑池臺自海棠
游騎行歌莫相笑遨頭六結已龜藏

病起初見賓僚時上疏句祠未報

浪將冠服衣猿狙因病偷閒稍自如時有好懷誇得句
畧無情語怕回書邊城晏閉稀傳箭村巷春游未荷鋤
迨此良辰公事少天恩倘許賦歸歟

陸務觀云春初多雨近方晴碧雞坊海棠全未及
去年

遲日溫風護海棠十分顏色醉春粧天公已許晴教好
說與鳴鳩一任忙

報事碧雞坊裏來今年花少似前回
笙簧冷落遨頭病
不著梁州打不開

清明日試新火作牡丹會

蜀人以洛中千葉種為京花單葉為川花

再鑽巴火尚浮家去國年多客
路賒那得青煙穿御柳
且將銀燭照京花香鬟半醉斜
枝重病眼全昏瘴霧遮
錦地繡天春不散任教檐雨捲泥沙

三月十九日夜極冷

誰勒餘寒不放回春深猶煖地
爐灰鄉心忽向燈前動

夜雨先從竹裏來，鷓鴣已如鶯百啁。
醪醑那得雪千堆，調麋煮藥東風老。
慚愧茶甌與酒盃。

垂絲海棠

春工葉葉與絲絲，怕日嫌風不自持。
曉鏡為誰粧未辦，沁痕猶有淚胭脂。

浣花戲題爭標者

凌波一劇便捐生，得失何曾較重輕。
蝸角虛名人尚愛，錦標安得笑渠爭。

鹿鳴宴

岷峨鍾秀蜀多珍坐上儒先更逸羣墨沼不憂經覆瓿
琴臺重有賦凌雲文章小技聊干祿道學初心擬致君
富貴功名今發軔願看稽古策高勲

陸務觀作春愁曲悲甚作詩反之

東風本是繁華主天地元無著愁處詩人多事惹閒情
閉門自造愁如許病翁老矣癡復頑風前一笑春無邊
糟牀夜鳴如落泉一杯正與人相闕

種竹了題愛山亭

灑埽宣華舍此君煙中月下綠生塵他年葉葉清風滿
莫忘今年借宅人

題錦亭

手開花徑錦成窠浩蕩春風載酒過來歲游人應解笑
甘棠終少海棠多

石湖詩集卷十七

欽定四庫全書

石湖詩集卷十八

宋 范成大 撰

初發太城留別田父

西蜀夏旱未行前數日連得雨父老云今歲又熟矣

秋苗五月未入土行人欲行心更苦
路逢田翁有好語競說宿來三尺雨
行人雖去亦伸眉翁皆好住莫相思
流渠湯湯聲滿野今年醉飽雞豚社

入崇寧界

桑間三宿尚回頭何況三年濯錦游
草草郾筒中酒處不知身已在彭州

懷古亭

在永康離堆之上離堆分岷江水一派
溉彭蜀而交流道郾縣以入於府江

朝來寫得故人書雙鯉難尋鴈亦無
付與離堆江水去解從郾縣到成都

離堆行

沿江有兩崖中斷相傳秦李太守鑿此以
分江水又傳李鎖鑿龍於潭中今有伏龍

觀在潭上蜀旱文江水涸即遣官致祭壅都江
水以自足謂之攝水無不應民祭賽者率以羊

歲殺四
五萬計

殘山狼石雙虎臥斧迹鱗皴中鑿破潭淵油油無敢唾
下有猛龍踰鐵鎖自從分流注石門西州秔稻如黃雲
剗羊五萬大作社春秋伐鼓蒼煙根我昔官稱勸農使
年年來激西江水成都火米不論錢絲管相隨看蠶市
款門得得酌清尊椒漿桂酒刪羶葷妄欲一語神豈聞
更願愛羊如愛人

崇德廟

李太守廟
食處也

雪山南風融雪汁化作岷江江水來不知新漲高幾畫

離堆石壁舊有水則記漲
痕占歲事一畫為一則

但覺樓前奔萬雷天教此水

入中國兩山辟易分道開我家長川到海處却在發源
傳酒杯人生幾屐辦此役遠游如許神應咍東歸短棹
昨已具明日發船撾鼓催灘平放溜日千里已夢鱸鱸
如雪堆丹楓繫纜一回首玉壘浮雲安在哉

戲題索橋

織簞勻鋪面排繩強架空染人高曬帛獵戶遠張罾薄
薄難承雨翻翻不受風何時將蜀客東下看垂虹

青城山會慶建福宮

宮舊名丈人觀予為請於朝賜今名入山前數日勅書至

自行在予就設醮以祝聖人壽云

墨詔東來洵驛傳璇題金榜照山川祥開聖代千秋節

響動仙都九室天觸石湧雲埋紫邏流金飛火燭蒼巔

祇應老宅龐眉客長記新宮錫號年

老宅即老人村也舊名潦澤疑傳之

誤余為更此名

再題青城山

萬里清游不暇慵雙旌換得一枝筇來從井絡直西路

上到江源第一峯海內閒身輸我佚山中佳氣為人濃
題詩試刻巖前石付與他年鮮暈重

玉華樓夜醺

青城觀殿前大樓制作瑰麗初夜有大炬出殿後峯上羽衣云數年前曾

一現已而如有風吹滅之比同行諸官至則無見矣予默禱云此燈果為我來者當再明使衆

共觀之語
訖復現

丈人峯前山四周中有五城十二樓玉華仙宮居上頭
紫雲瀕洞千柱浮剛風八面寒颼颼靈君宴坐三千秋
躋符飛行戲元洲下晚濁世悲蜉蝣桂旗偃蹇澹少休

知我萬里遙相投暗蜩奏樂鉦鳴球浮黎空歌清夜道
參旗如虹歟下流化為神燈燭巖幽火鈴洞亦凌空旂
誰歟蔽虧黯然收禱之復然為我留半生縛塵鷹在韉
豈有骨相肩浮丘山英發光洗羈愁行迷未遠夫何尤
笙簫上雲神欲游揖我從之驂素虬

上清宮

自青城登山所
謂最高峯也

歷井捫參興未闌丹梯通處更躋攀冥濛蜀道一雲氣
破碎岷山千髻鬟但覺星辰垂地上不知風雨滿人間

蝸牛兩角猶如夢更說紛紛觸與蠻

最高峯望雪山

大面峯頭六月寒神燈收罷曉雲班
浮空忽湧三銀闕
云是西天雪嶺山

范氏莊園

夕陽塵土漲郊墟六六峯頭夢覺餘
竹色喚人來下馬
亂蟬深處有圖書

青城縣何子方使君同年園池

橙塋芋壠意中行浩蕩薰風不計程
雨脚背人歸玉壘
江聲隨馬入青城五橋今日新
知路千佛當年舊綴名
水竹光中同一笑
西君荷露濯塵纓

何同年書院

有丹竈
甚雅

竹色侵晚帙泉聲漱嵌根
試通丹竈路應到老人村

江源縣張季長正字家善頌堂

季長盡出先世所
藏圖書壁有趙清

獻公為令時題名是日食新米
坐中皆贊喜夏初嘗大旱也

我窮江源來名勝頗追逐
薰風秀沃野在處得奇矚
頌

堂有佳士文字照縑竹圖書抱世守古錦韜玉軸黃金
不滿簾故國有喬木逡巡酒如澠霍霍具水陸田頭新
穀升一飯香滿屋回思閑雨時敢望遽炊玉摩挲壁間
題明府遂州牧山高江水長百世照尸祝我來坐琴壇
琴壇在成都西園清獻公彈琴宴坐處 覩汗媿前躅空餘煙霞痼未許是
公獨請歌青城游或附者舊錄

蜀州西湖

荷花正盛開水月登舟亭也湖陰亭外別有白蓮尤奇蜀中無幾至此始見之

閒隨渠水來偶到湖光裏仍呼水月舟徑度雲錦地誰

云不解飲我已荷香醉湖陰
玉嬋娟竄立紅粧外何須
東閣梅悠然自詩思驚風入
午暑水竹有秋意采菱不
盈掬興與蓴鱸會遙知新津
宿魂夢亦清麗

新津道中

雨後郊原淨村村各好音
宿雲浮竹色清溜走檀陰
曲沼擎青蓋新畦藝綠針
江天空濶處不受暑光侵

次韻陸務觀編修新津遇雨
不得登修覺山徑過

眉州三絕

新津館舍上漏下濕送客皆不堪憂
修覺一望人云可見劍門杜子美所

謂西川供客眼處眉
山城中悉是汙池

送客多情難語離
僕夫無情車載脂
平生飄泊知何限
少似新津風雨時

離合紛紛怕遠游
遠游仍怕賦登樓
何須一望三千里
望盡西州轉更愁

雨後暮頤山色開
玻璃江清已可杯
綠荷紅芡香四合
又入芙蓉城裏來

中巖

去眉州一程
諾詎羅尊者道場相傳
昔有天台僧遇病僧與之木鑰匙云異時至眉州中

巖扣石筍當再相見後果然今三石屹立如樓
觀前兩樓純紫石中一樓蘿蔓被之傍有寶瓶
峯甚端正山半有喚魚潭慈姥龍所居世傳鴈
蕩大小龍湫亦詔詎羅道場豈化人往來無常
處耶

赤巖倚玲竚翠邏森戍削岑蔚嵐氣重稀間暑光薄聊
尋大士處往扣洞門鑰雙撐紫玉關中直矗翠雲幄應供
華藏海歸坐寶樓閣無法可示人但見雨花落不知龍
湫勝何似魚潭樂夜深山四來人靜天一握驚看松桂
白月影到林壑門前六月江世界塵漠漠寶瓶有甘露

一滴洗煩濁捫天援斗杓請為諸君酌

慈姥巖與送客酌別風雨大至涼甚諸賢用中巖
韻各賦餞行詩紛然擘牋清飲終日雖無絲竹
管絃而情味有餘

山靈知我厭塵土喚起蟄雷鏖午暑松風無力雨絲長
散作毵毵雪塵舞巖前懸溜珠簾傾安得吹來添玉觥
詩成酒盡腸亦斷休喚佳人唱渭城

次韻陸務觀慈姥巖酌別二絕

送我彌旬未忍回
可憐蕭索把離杯
不辭更宿中巖下
投老餘年豈再來

明朝真是送人行
從此關山隔故情
道義不磨雙鯉在
蜀江流水貫吳城

次韻代答劉文潛司業二絕

平羌江上首空回
慈姥巖前定把杯
縱使石腸都忘却
也應風雨送愁來

回廊月下短歌行
惟有知音解有情
一曲紅窓聲裏怨

如今分作兩愁城

玳瑁江一首戲效陸務觀作

玳瑁江頭春渌深
別時汙汙流到今
祇言日遠易排遣
不道相思翻苦心
烏頭可白我可去
菖花易青君易尋
人生若未免離別
不如碌碌無知音

余與陸務觀自聖政所分袂
每別輒五年離合又
常以六月似有數者中
巖送別至揮淚失聲留
此為贈

宦途流轉幾沉浮，雞黍何年共一丘。
動輒五年遲遠信，常於三伏話羈愁。
月生後夜天應老，淚落中巖水不流。
一語相開仍自解，除書聞已趣刀頭。

萬景樓

在漢嘉城中山上，登覽勝絕殆冠西州。予令畫工作圖以歸山谷，來游時但有安樂

園未有此樓也

左披九頂雲，右送大峨月。
殘山剩水不知數，一一當樓供勝絕。
玻瓈濯錦遙相通，指麾大渡來朝宗。
川靈胥命各東去，我亦順流呼短篷。
詩無傑語慚風物，賴有丹青

傳小筆仍添書客倚闌看令與山川相映發龍彎歸路
繞烏尤棟雲簾雨邀人留若為喚得涪翁起題作西南
第一樓

凌雲九頂

即大石佛處初登山時巖壁上悉刻為
小佛不知其數山前佛頭灘受雅江之

衝最為
艱險

聊為東坡載酒游萬龕迎我到峯頭江搖九頂風雷過
雲抹三峨日夜浮古佛臨流都坐斷行人識路亦歸休
酣酣午枕眠方丈一笑閒身始自由

戲題方響洞

漢嘉廣福院中水洞有聲琅然莫知其所在舊名丁東水山谷易今名止

題詩云古人名此丁東水自古丁東直至
今我為改為方響洞要知山水有清音

隔凡水澗不可越衆真微步壺中月徙倚含風玉珮聲
何須聽作筵賓鐵

問月堂酌別

半明燈火話悲酸此會情知後會難四海宦游多聚散
一生情事足悲歡鬢絲今夜不多黑酒量徹明無數寬
醉夢登舟都不記但聞風雨滿江寒

別後寄題漢嘉月榭

陸務觀所作同年謂王子蒼萬景嘉州酒名湖亭明月湖

也在州治前方作旗亭月榭正直大峨取太白峨眉山月之語以名傍有一巖景趣尤佳子蒼

欲作樓未果

隱吏詩情卜築幽同年惜別勸淹留試傾萬景湖亭酒
來看半輪江月秋川路雖長猶共此夜船空載且歸休
碧巖勝處頻回首好事誰能更小樓

過燕渡望大峨有白氣如層樓拔起叢雲中

圍野千山暑氣昏大峨煙靄亦繽紛玉峯忽起三千丈

應是兜羅世界雲

蘇稽鎮客舍

送客都回我獨前
何人開此竹間軒
灘聲悲壯夜蟬咽
併入小窓供不眠

峨眉縣

縣出符文布婦女人人績麻且行且觀
田家東蒿然於門口為香氣以迎客

窮鄉未省識旌旄
雞犬歡呼巷陌騷
村媪聚觀行績布
野翁迎拜蹠然蒿
泉清土沃稻芒蚤
縣古林深槐癭高
珍重里儒來獻頌
盛言千載此丘遭

初入大峨

煙霞沉痼不須醫此去真同汗漫期
曾欵上清臨大面仍從太白問峨眉
山中緣法如今熟世上功名自古癡
賸作畫圖歸挂壁他年猶欲臥游之

華嚴寺

衆峯攢壁立中有路一綫攀援白雲梯
食頃已天半我本紫芝曲誤落青芻棧
向來脫新羈恍已還舊觀花煙辭少城
暑雪對大面來從太白西更走三峨偏
風生兩

腋輕泉吼四山眩今晨第一程莫歎興僕倦

中峯

有晉賢閣背倚白崖峯餘七十峯共環之茂真尊者舊巷在峯下其傍一峯最秀號呼應

孫思邈所往來傳云茂真與孫常相呼而應故名

凌高躡危峯斗下頻幽谷仙英馥椒蘭嘉蔭直旋空
翠元不雨洩雲自膏沐暑綌森有稜瘁肌淒欲粟白崖
如負依金界莫蒼麓衆峯拱二八娟妙繞重屋真人與
尊者幽居接松竹呼之倘肯應留我試餐玉

雙溪

在白水寺前兩溪各自一山來蔣出橋下前行入林數十步合為一水洄向深潭以入寶

現溪僧云此景猶在廬山三峽鴈蕩龍湫之上
溪中舊常有兩石子關日照溪中常有五色光
相

冷風騷騷木葉低洞淵阻深生怪奇碧琳雙澗黑無底
中有玉龍相對飛雷轟雪捲入林樾化為一龍潭底沒
摩尼關罷四山空時有寶光巖下發

寶現溪

雙溪合而一既出巖竇散為此溪叢語三藏
自西域歸過溪見兩石子關攪得其一今

藏黑水寺石上有一目
端正透底溪以此得名

粲粲卷畫沙鄰鄰麴塵水朝陽相發揮光景艷孔翠寧

聞雙溪號但見縠紋細神魚不謀食終日印潭底躍珠
本具眼聊共阿師戲收藏更傳寶一笑落第二

點心山

在白水寺後
自此登峯頂

入山窘宿雨上山賀朝霽跬步便歷險轉盼已吁氣豈
惟膝點心固已頭搶地游人貪勝踐姑吟蜀道易

大扶擗

身如魚躍上長竿路似鏡中相對看珍重山丁扶我過
人間踽踽獨行難

小扶捍

食時方了大扶捍前途仄徑仍崎嶇懸崖破棧不可玩
輿丁挾我如騰狙平生行路險艱足如今雪鬢應難綠
却憐苔髮鎮長青千古參參挂高木

胡孫梯

峽山有胡孫
愁予常過之

木磴鱗鱗滑帶泥微生歌側寄枯藜胡孫愁處我猶過
箇裏如今幸有梯

雷洞平

七十二洞皆在道傍大早有禱投香花不
應即以大石或死鼠及婦人弊履投而觸

之雷雨
即至

行人魄動風森森兩崖奔黑愁太陰不知七十二洞處
側足下窺雲海深聞有神龍依佛住根觸須臾名雷雨
兩川稻熟須好晴我亦閒游神勿驚

八十四盤

冥鴻無伴鶴孤飛回首塵籠一笑嬉八十四盤新拄杖
萬三千乘舊牙旗石梯碧滑雲生後木葉紅斑雪霽時
說與同行莫惆悵人間捷徑轉欽巖

婆羅平

仙聖飛行此是家路逢真境但驚呀神農嘗外盡靈藥
天女散餘多異花嵐雨逼衣寒似鐵冰泉炊米硬於沙
峯頭事事殊塵世缺甃跳梁笑井蛙

思佛亭曉望

栗烈剛風刮病眸登臨何啻緩千憂界天暑雪青城外
湧地晴雲瓦屋頭浩蕩他年誇北客蒼茫何處認西州
千巖萬壑須尋徧身是江湖不繫舟

光相寺

峰頂四時如大冬
芳花草春自融
苔痕新晞六月雪
木勢舊偃千年風
雲物為人布世界
日輪同我行虛空
浮生元自有超脫
地上可憐悲撻蓬

七寶巖

大峨絕頂白水寺已在山半
由白水陡上至巖又六十里

天如碧玉甌
下覆白玉盤
晶光眩相射
我獨居兩間
正視不勝瞬
却立聊少安
但覺風浩浩
骨毛森以寒
神仙杳無處
寧論有塵寰
身輕一槁葉
兩腋如飛翰
同行挽

我衣何往何當還少留作詩去奇哉此憑闌

淳熙四年六月二十七日登大峨之巔一名勝
峰山佛書以為普賢大士所居連日光相大現
賦詩紀實屬印老刻之以為山中一重公案

勝峰高哉摩紫青白鹿導我登化城住山大士喜客至
兜羅布界續相迎圓景明暉倚雲立艷如七寶莊嚴成
一光未定一光發中有墨像隨心生白毫從地插空碧
散燭象緯天龍驚夜神受記亦修供照世洞然千百燈

明朝銀界混一白咫尺眩轉寒凌兢天容野色慘開閉
慘澹變化愁仙靈人言六通欲大現洗山急雨如盆傾
重輪疊采印巖腹非煙非霧非丹青我與化人中共住
鏡光靚面交相呈前山忽湧大圓相日圍月暈浮青冥
林泉草木盡含裹是則名為普光明言詞海藏不勝讚
北峰復有金橋橫衆慈久立佛事竟一塵不起山岭岼
向來無法可宣說為問有耳如何聽我本三生同行願
隨緣一念猶相應此行且復印心地衣有寶珠奚外營

題詩說偈作公案亦使來者知吾曾神通佛法須判斷
一任熱碗春雷鳴

詣佛閣晚望雪山數十峰如爛銀晃耀暑光中
累塊蒼然是九州大千起滅更悠悠雪光正照天西角
日影長浮雨上頭峰頂何曾知六月塵間想已別三秋
佛毫似欲留人住橫野金橋晚未收

淨光軒

白水寺

翳華銷盡八窓明雨竹風泉演妙聲身世只今高幾許

北峰渾共倚闌平

虎溪

黑水寺前雖不及雙溪亦佳處也開山僧至此斷渡一虎踞前因跨之亂流以濟今作橋

其上水歲推
盪輒更新之

水本無心作浪波經行偶與石相磨不須更問橋安否
喚取於菟載我過

白雲峽

牛心寺

雙溪疑從銀漢下我欲窮源問仙舍飛瀾濺沫漱籃輿
却望兩崖天一罅踈踈暑雨滑危梯策策山風掖高駕

幽尋險絕太奇生莫笑退之號太華

孫真人菴

何處仙翁舊隱居青蓮巉絕似蓬壺雲深未到淘朱洞
雨小先尋煉藥爐磻下草香疑可餌林間虎伏試教呼
閒身儘辦供薪水定肯分山一半無

龍門峽

插天千丈兩碧城中有玉壑穿巖扃瀑流懸布不知數
亂落嵌根飛白雨瑤琨為室雲為關龍君所居朱夏寒

不辭擊棹更深入萬一龍驚雷破山

既離成都故人送者遠至漢嘉分袂其尤遠而
相及於峨眉之上者六人范季申郭中行楊商
卿嗣勲李良仲譚德稱口占此詩留別

我本住林屋風吹來錦城錦城亦何樂所樂多友生相
從不知久相送不計程橫絕峨眉巔欲去有餘情吾宗
蓋難弟李郭人中英二楊懿文德譚子資粹清相視心
莫逆劇談四筵輕明朝各回首雲水相與平我今投紱

去行且扶藜耕淒涼別知賦慷慨結客行後會豈不好
路長恐寒盟諸賢乃不凡骨相有功名大廈罩羣木明
廷朝萬靈王畿坦如砥結綬當同登道傍石湖水誰能
叩柴荆夢中儻相見秉燭聽殘更

聞威州諸羌退聽邊事已寧少城籌邊樓開檻
修葺亦畢工作詩寄權制帥高子長

籌邊樓上美髯翁赤白囊飛笑語中勃律天西元采玉
蓬婆雪外昨分弓踏筵舞罷平闌月橫槩詩成滿袖風

諸校各能歌破陣何須琴裏聽平戎

破陣平戎皆有本事子長當一笑領

石湖詩集卷十八

欽定四庫全書

石湖詩集卷十九

宋 范成大 撰

捷為江樓

河邊堵立看歸篷
三老開頭暮欲東
漲水稠灘連峽內
淺山浮石似湘中
無人驛路榛榛草
有客江樓浩浩風
種落塵消少公事
賸裁新語寄詩筒

縣令師永錫
同年能詩

宣化道中

瘦草蕭疎已似秋盤陀山骨束江流兩崖若不顧如鐵
爭得狂瀾拍岸休

將至叙州

亂山滿平野漲水豪大川仄徑無輟跡疎林有炊煙山
農旦燒畬蠻賈暑荷氎窮鄉足荒怪打鼓催我船

七夕至叙州登鎖江亭山谷謫居時屢登此亭有
詩四篇敬用其韻

水口故城丘壠平新亭乃有絙鐵橫

舊戎州在對江山趾下臨馬湖蠻江

路蠻自江出必過城下故寔鎖以為限今遷城過江已失形勝而猶於亭下鎖江特以攔稅而已非本旨也

歸艤擊汰若飛渡一雨徹明秋漲生東樓鎖江兩重客
筆墨當代俱詩鳴我來但醉春碧酒星橋脈脈向三更

郡醞舊名重碧取杜子美東樓詩重碧
酤春酒之句余更其名春碧語意便勝

江安道中

近瀘州最險處號張旗三灘言張旗之
頃已過三灘其湍急如此瀘戎之間有

渡瀘亭然不知孔明竟出何路今鎖江對岸廢
城下臨馬湖有韋臯紀功碑歸然荒榛中疑此

或是
古迹

穠綠連村荔子丹瘴雲將雨暗前灣張旗且喜三灘駛

叱馭曾驚九折艱
瀘水舟聞迷古渡
馬湖碑缺伴荒山
威名功業吾何有
無事飄飄犯百蠻

瀘州南定樓

歸艖東下興悠哉
小住危闌把一杯
樓下沔沔內江水
明朝同入大江來

題譚德稱扇

德稱與楊商卿父子送余遠至瀘之合江以扇求詩各為題一絕

蠻風吹雨瘴江肥
短草荒山鳥不飛
盡是瀘南腸斷句
如今分與故人歸

題楊商卿扇

君歸我去兩銷魂
愁滿千山鎖瘴雲
後夜短檠風雨暗
誰能相伴細論文

題楊子容扇

雙竹軒窓聽讀書
垂天雲翼要搏扶
與君只作三年別
射策東來過石湖

譚德稱楊商卿父子送余自成都合江亭相從至
瀘南合江縣始分袂水行踰千里作詩以別

合江亭前送我來合江縣裏別我去江流好合人好乖
明日東西南北路千里追隨不忍歸一杯重把知何處
臨岐心曲兩茫然但祝頻書無別語

發合江數里寄楊商卿諸公

臨分滿意說離愁草草無言祇淚流船尾竹林遮縣市
故人猶自立沙頭

過江津縣睡熟不暇梢船

西風扶櫓似乘槎水濶灘沉浪不花夢裏竹間喧急雪

覺來船底滾鳴沙

恭州夜泊

草山磽确強田疇村落熙然粟豆秋
翠竹江村非錦里
青溪夜月已渝州
小樓高下依盤石
弱纜西東戰急流
入峽初程風物異
布裙跣婦總垂瘤

大熱泊樂溫有懷商卿德稱

暑候秋逾濁江流晚更渾
瘴風如火炊嵐月似煙
昏城郭廩君國山林妃子園
故人新判袂得句與誰論

涪州江險不可泊入黔江樣舟

黃沙翻浪攻排亭
濱淖百尺呀成坑
坳窪眩轉久乃平
一渦熨帖千渦生
篙師絕叫毆川靈
鳴鏡飛渡如奔霆
水從岷來如濁涇
夜榜黔江聊濯纓
玻璃徹底鏡面清
忽思短棹中流橫
釣絲隨風浮月明

妃子園

涪陵荔子天寶所貢去州里所有此園然
峽中荔子不及閬中遠甚陳紫又閬中之

最也

露葉風枝驛騎傳
華清天上一嫣然
當時若識陳家紫

何處蠻村更有園

豐都觀

在豐都縣後三里平都山舊名仙都觀相傳前漢王方平後漢陰長生得道處陰君

上升時五雲從地湧出丹竈古柏皆其故物晉隋殿宇無恙壁畫悉是當時遺蹟內王母朝元隊仗尤奇道士云此地即所謂北都羅豐所住又名平都福地也

神仙得者王方平誰其繼之陰長生飄然空飛五雲輶
上賓寥陽留玉京石爐丹氣常夜明寵光萬柏森千齡
峽山偪仄岷江縈洞宮福地古所銘云有北陰神帝庭
太陰黑簿囚鬼靈自從仙都啟巖扃明霞流電飛陽晶

暉景下墮鑠九水塞絕苦道升無形至今臺殿棲玲玢
隋圯唐堊留丹青十仙怪竒溪女清瑤池仙仗紛娉婷
琅璈赴節鏘欲鳴我來秋暑如炊蒸汗流呀氣扶枯藤
摩挲衆蹟不暇評聊記梗槩知吾曾

萬州西山湖亭秋荷尚盛

叢蒼忽明眼山腰灩湖光列岫繞雲錦深林護風香西
山即太華玉井餘秋芳隔江招岑仙共擘雙蓮房

下巖

疇昔中巖一夢殘
下巖風景亦高寒
峽中無處堪停棹
雨後今朝始凭闌
不用苦求毫相現
祇教長挂水簾看
山僧勸我題蒼壁
坡谷前頭未敢刊

魚復浦泊舟望月出赤甲山山形斷缺如鼉龍坐
而張頤月自缺中騰上山頂

月生赤甲如金盆
蹲龍呀口吐復吞
長風浩浩挾之出
影落半江沉復翻
天高夜靜四山寂
惟有灘聲喧水門
高齋詩翁不可作
我亦不眠終夕看

夔州即事

自東川入峽路至恭州便有瘴俗夾岸山悉瘴小入夔界山皆傑然連三峽夔

水不可飲取之臥龍十里之外雲安麴米春自唐以來稱之今夔酒乃不佳

峽行風物不堪論
裊暑驕陽雜瘴氛
人入恭南多附贅
山從夔子盡侵雲
竹枝舊曲元無調
麴米新筩但有聞
試覓清泠一杯水
筒泉須自臥龍分

瞿唐行

七月十九日至夔子灘瀕撒髮不可犯是夜水漲及山腹詰旦視灘瀕則已在水中

土人云此青草瘴也可以冒險而入遂鼓棹畧其頂而過郡中遣候兵立山上每一舟平安則搖幟以招後舟白鹽赤甲皆峽口大山黃嵌黑石皆峽中至險處入峽西岸有聖泉舟人或向

之疾呼曰人渴也泉即迸下一杯
許復乾余舟過甚急未之試也

川靈知我歸有程一夜漲痕千丈生中流擊楫洶作氣
夾岸斂旗呀失聲不知灩澦在船底但覺瞿唐如鏡平
鑿峽疏川狠石破號山索飲飛泉驚白鹽赤甲轉頭失
黑石黃嵌拚命輕草薺增肥無泊處竹枝凝咽空餘情
人間險路此奇絕客裏驚心吾飽更劒閣翻成蜀道易
請歌范子瞿唐行

夜泊歸州

州有宋玉宅昭君臺

舊國風煙古
新涼瘴癘清
片雲將客夢
微月照江聲
細和悲秋賦
遙憐出塞情
荒山餘閼闕
兒女擅嘉名

秭歸郡圃絕句二首

花竹蕭騷小圃畦
官居翻似隱淪棲
巴山四合秋陽滿
杜宇黃鸝相對啼

孤城偏仄復偏仄
前山後山青欲來
市聲蕭條衙鼓靜

惟有叱灘喧萬雷

叱灘即黃魔灘
下連人鮓壩

宋玉宅

相傳秭歸縣治即其舊址縣左
旗亭好事者題作宋玉東家

悲秋人去語難工
搖落空山草木風
猶有市人傳舊事
酒壚還在宋家東

後巫山高一首

余前年入峽常賦巫山高今復作一篇十二峯中東西各一峯最奇

不可繪畫左右前後餘峯之可觀者尚多不止十二峯也不問陰晴雲物常相映帶尤為勝絕但以漲江湍怒難擬泊鼓棹而過不復登廟前余以水暴漲得下瞿唐至巫山縣人云却須水退始可入巫峽一夜水落十餘丈遂不復滯留

凝真宮前十二峯
兩峯娟妙翠插空
餘峯競秀尚多有
白壁蒼崖無數重
秋江漱石半山腹
倚天削鐵荒行蹤

造化鍾奇矗瑤巘真靈擇勝深珠宮朝雲未罷暮雲起
陰晴竟日長冥濛瑤姬作意送歸客一夜收潦仍回風
仰看館御飛檝過回首已在虛無中惟餘烏鴉作使者
迎船送船西復東

黃牛峽

廟為黃牛神所居即石馬繫祠門處東坡所書歐公詩及本事碑石在東廡祠後高

峯之上上有黃牛迹客舟甚敬之以歐公故石馬亦有靈高護甚嚴

朝離悲秋宅午榜疊石磯小留黃牛廟細讀石馬詩黃
牛隱見蒼山裏石馬至今猶馘耳當年夢境識仙翁馬

為迎門神為起物生不朽繫所逢歐詞蘇筆蒼苔封山
高水長翁之風石馬亦與翁無窮

假十二峯

即黃牛峽山自此直至平
喜堤千峯重複靡不奇峭

巴東三峽數巫陽山入西陵更鬱蒼何以假為非確論
直疑溟滓弟高唐

扇子峽

兩岸山尤奇殆過巫
峽蝦蟇碕在南岸

茲行看山真飽諳今晨出峽仍窮探南磯北磯白鐵壁
千峯萬峯蒼玉簪橫前直疑江已斷崛起競與天相

攬蜀山欲窮此盤礴禹力且盡猶鑿剡望舒宮中金背
蟾泥塗脫盡餘老饒下飲岷江不知去流涎落吻如排
髯挈瓶樣棹軒清甘未暇煮茗和薑鹽聊將滌硯濡我
筆恍惚詩律高巉巖

荆渚中流回望巫山無復一點戲成短歌

千峯萬峯巴峽裏不信人間有平地渚宮回望水連天
却疑平地元無山山川相迎復相送轉頭變滅都如夢
歸程萬里今三千幾夢即到石湖邊

魯家汭入沱

三江口即岳陽路水大難行遂入沱行沱中最空曠處名百里荒蕪區也

過盡巴東巫峽長
荆川鼓棹更茫茫
避風怕入三江口
垂月貪行百里荒
夜後逢人盡刀劍
古來踏地皆耕桑
可憐行路難如此
一簇寒蘆尚稅場

鄂州南樓

誰將玉笛弄中秋
黃鶴飛來識舊游
漢樹有情橫北渚
蜀江無語抱南樓
燭天燈火三更市
搖月旌旗萬里舟
却笑鱸鄉垂釣手
武昌魚好便淹留

題黃州臨皋亭

夏口風帆赤壁磯
雪堂醺酒竹樓棋
繫舟一日黃州下
只辦登臨不辦詩

江州庾樓夜宴

前瞰大江後臨廬山登臨名勝殆甲他處庾亮南樓乃在武昌非此

也亮常刺江州後人製此名非斯樓之要

岷江漱北渚
廬阜窺南窓
名山復大川
超覽茲樓雙
何必元規塵
自足豪他邦
使君秣田熟
新涼簞酒缸
落景澹碧瓦
長虹吐金缸
客從三峽來
噩夢隨奔瀧
小留聽

琵琶船旗卷修杠請呼裂帛絃為拊洮河腔曲終四憑
闌倦游心始降明發挂帆去曉鐘煙外撞

東林寺

慧遠師白蓮社也傍有樂天草堂對山絕頂即天池文殊現燈處李成焚劫南北山

獨不毀
二林

談易繙經宰木春三生猶自裊煙熏客塵長隔虎溪水
劫火不侵香谷雲老矣懶供蓮社課歸哉快讀草堂文
山頭一任天燈現箇事何曾落見聞

過虎溪對東林蒼巖翠樾下浸大澗宛似靈隱冷

泉囑長老法才作亭名曰過溪且為率山丁雍
草定基一朝而畢

過溪無限翠屏開大笑從教虎子猜不獨山中添故事
仍教題作小飛來

病倦不能過谷簾三峽寄題

白龍青峽紫煙爐山北山南只半塗說與同來綠玉杖
他年終補臥游圖

湖口望大孤

廬阜岡勢斷江流潏相通大孤如小冠插入蒲淪中我
欲蛻濁浪往馭揚瀾風晃晃銀色界濛濛水晶宮濯足
望八荒列宿羅心胸客帆詎肯駐搔首蒼煙叢

澎浪磯阻風

浦口藏舟尋丈慳篙師抱膝朝暮閒逆風來從水府廟
濁浪欲碎小孤山太白猶高缺蟾墮長江未盡歸鬢斑
短歌聊復怨行路當有聽者凋朱顏

馬當湫阻風居人云非五日或七日風不止謂之

重陽信

拍岸回流逆上磯
枯楊折葦靜相依
趁墟漁子晨爭渡
賽廟商人晚醉歸
重九信來風未慙
大千行徧昨俱非
羈愁萬斛從頭數
帶眼今秋又減圍

放舟風復不順再泊馬當對岸夾中馬當水府即
小說所載神助王勃一席清風處也戲題兩絕
萬里東隨倦客東馬當山嘴勒孤篷無才解賦珠簾雨
誰肯相賒一席風

禁江上口柏山東三日荒寒繫短篷却憶宮亭湖裏去
隨人南北解分風

守風嘲舟子

奪命稠灘百戰餘守風端坐恰乘除日長飽飯佳眠覺
閒傍蘆花學釣魚

佛池口大風復泊

碧葦無思連天生青山有情終日橫風聲洶怒木朝拔
川氣流光珠夜明誰能坐守白頭浪我欲往騎金背鯨

俛仰之間撫四海可憐步步愁江程

長風沙

夕陽明遠帆高浪兀孤嶼綿綿淮山來閃閃沙鳥去落
木兩三家炊煙南北渡眉伸擊汰行夢愕阻風處

九月八日泊池口

斜景下天末煙霏酣夕紅餘暉染江色潋灩琥珀濃我
從落日西忽到大江東回首舊游處曛黃錦城中藥市
并樂事歌樓沸晴空故人十二闌豈復念此翁

池州九日用杜牧之齊山韻

年年佳節歌式微秋浦片帆還欲飛
萬里蜀魂思遠道九歌楚調送將歸
杯中山影分秋色木末江光借夕暉
細撚黃花一枝盡霏霏金屑滿征衣

離池陽十里清溪口復阻風

恰從秋浦挂蘆篠又泊清溪十里餘
愁水愁風吹帽後作雲作雨授衣初
遠尋草市沽新酒牢閉篷窗理舊書
行路阻艱催老病騷騷落雪滿晨梳

梅根夾

辛苦凌波棹平安入夾船日明漁浦網風側瓦窰煙老
圓容挑菜村平橫索錢且投人處宿終夜得佳眠


宿長蘆寺方丈

塔廟新浮水汀洲舊布金聊憑一葦力與障萬波侵帆
影窺門近鐘聲出院深夜聞雷破夢歌枕聽潮音

將至吳中親舊多來相逕感懷有作

望見家山意欲飛古來燕晉一沾衣回思客路豈非夢

乍聽鄉音真是歸新事畧從年少問故人
差覺坐中稀
不須更說桑榆晚霜後鱸魚也自肥



石湖詩集卷十九